

陳州府志卷之二十二

楚野崔應階吉升氏纂修

列女

扶溝縣節孝

宋李氏丁尙賢妻元劉秉忠陷邑城不戢士卒李爲亂兵所執欲污之怒罵曰我爲義門婦豈肯從賊以簪刺喉而死

明壬申七烈者李文明妻張李金妻吳張秦妾李羅理妻楊直溝河李氏女裴村吳氏女北關李氏女也正德七年寇掠邑境避亂爲賊所執義不受辱張斷臂

死吳刃腹剖孕李戮屍於野犬爲之守楊亂刀潰體
暴屍而去李氏女給賊自投於河吳氏女賊怒而投
諸火李氏女詈賊被害於壇壝之墟俱舍生全節身
隕名香者也

康氏傳時雨妻時雨琴士也以病卒康誓死偃卧柩側
謝絕飲食或強之不可氣息奄奄卜八日始絕面色
如生弔者有悼其左計猶作顰蹙狀

張氏鄉耆璉之女許聘劉良士良士卒女飲泣不食父
兄謂曰女未醮臣質未委女不答復有約婚者母喜
告之赭面含悲入閣自經死

張氏生員劉清妻年二十二夫亡甘貧紡織養舅姑四十餘年如一日知縣陳紀上其事詔旌表之

翟氏生員周魯妻年二十二夫亡持節奉舅姑撫子成立知縣劉璋上其事敕旌其門

趙氏史寬妻寬蚤亡舅姑卧病侍藥粥始終不懈舅姑以壽終其後子孫繁衍人稱孝感云

路氏楊子山妻夫死生遺腹子相依爲命姑老病無它兄弟極力孝養貧不能給姑性嚴急數遭鞭笞無怨言姑歿破產以塋

李氏何允恩妻夫死翁嬾耗蕩家李強挽之存萬分之

一撫遺孤迄不廢有縉紳欲奪其節父許之不從持
節五十餘年孫成立爲時名彥

楊氏生員高尚孝妻夫亡無子自經數四以抹免家貧
拮据事姑一夕夢故夫狎語之覺而泣曰豈心未灰
燼卽益毀容貧乏至食草木

高氏楊遷佐妻夫早亡翁爲學博嗜飲不顧家高勤績
紡供朝夕及病脫簪珥辦藥粥死無以爲葬日夜哀
號泪盡血繼邑里莫不哀之

王氏呂誥妻夫亡遺腹生子光守節撫孤六十餘年奉
旨旌表

高氏廩生張學曾妻事公姑以孝聞學曾卒絕粒三日
姑慰之曰吾老矣汝死如爾孤何於是篝燈紡績和
熊訓子遂爲名儒直指楊上其事建坊旌表

李氏杜孟芳妻芳卒守志四十年忽有孤鴈栖其庭噉
噉哀鳴麾之不去蓋正氣感召云

王氏劉拱祿妻幼孤適拱祿二年夫死有子未幾子夭
欲自縊家人防衛謹將葬給衛者使視姑寢衰服自
經直指姚題請旌表

李氏貢生杜汶繼妻夫亡守節撫孤將三十年孤化宣
入邑庠復歿撫幼孫辛苦萬狀冰蘖之操終始不渝

常氏劉治民妻治民早卒孝事公姑撫孤三十年至親罕見其面闖寇掠汴携孤南避雖日不舉火猶教子鴻駿力田讀書鄉里稱苦操云

劉氏楊一耀妻夫早故流涕自誓奉姑撫孤六十餘年巡按疏請旌表後子姓蕃衍累入黌序

溫氏庠生路康途妻廩生飛離之母孀居課子土賊陷城召家人區處後事國汝輩各自爲計吾義不受辱遂抗節墜樓死本朝雍正十一年旌表入祠

桑氏練寺民家女李氏村莊李孔則女賊掠境逼命土馬狃堅執不從罵賊而死

盧氏明經盛春女歸尉氏生員侯嘉賓嘉賓早卒以節
孝著及舅姑歿携子依母家扶城中聞寇變急爲姑
謀葬事畢寇至遂投井死

劉氏生員澤灝女歸鄆陵常錫九闖賊至鄆適歸寧聞
變如鄆中途被賊執逼之行不從殺於李家集

郭氏李齊美妻一子宗聖闖賊至被擄度不免乃給賊
釋夫與子遂自刎而死賊恨仍腰斬之

許氏劉文元妻城破賊欲掠之去不從投水死

張氏鄉民許之遜妻流賊至爲所執強之行不屈掖上
馬輒投於地鞭之張大罵賊怒殺石傍積箕焚之與

石俱碎焉

常氏庠生李光啟妻光啟謝世寇初熾常鑿井垣中顧家人曰此吾輩安宅也城破率二青衣赴之如就舍焉

高氏鵠臚寺鳴贊郝騰妻土寇蠭起隨夫避難中途遇賊驚奔而北高奔而西賊追及逼之行嗔目曰殺卽殺耳吾方伯姪婦而漳邱孫女豈汝從乎遂遇害後從姪高明樓得其屍藁葬之本朝康熙六十年孫監生作霖起輓輿騰合葬雍正十一年建坊旌表設

三節孝祠

國朝邢氏高習曾妻年二十四夫故事舅姑孝撫幼子成立守志四十餘年邑令白表其門曰節凜冰霜

韓氏陳獻璋妻年二十八夫故無子孀居苦節至年八十四邑令杜表其門曰節義維風

李氏朱待聘妻年二十四夫故苦志孀居孝事公姑撫幼子成立壽八十四而終

吳氏鄭合美妻年二十四夫邁疾不起子中素甫二齡訣曰以是藐孤爲託第汝年少家貧時艱何以濟之吳指天誓曰余當從死但襁有弱子敢不勉力倘半菽不支泉路可待也於是茹苦撫孤女紅自活無何

土寇紛披邑里蕭條或竟日不舉火機軸之聲達曙
雖嚴冬寒冱墮指無怨也子知向學擇師誨之中素
敦學行入庠食餼吳年至六十邑令高旌其門曰栢
操荻訓

高氏職方王真卿妻職方死王事翼其子於風雨漂搖
中篝燈紡織教以成名邑令楊旌其門曰慈壽懿模
常氏准貢王璇妻事公姑孝姑病篤焚香告天割股以
進遂愈

杜氏臨賀令俊彥女御史之昂女兄也年十七歸儒童
姜元善未三載元善病篤謂之曰汝身方娠倘天假

以藐孤不爲若敖之惆留而善視之苟生女聽自爲計也杜誓以身殉元善卒未幾生女卽欲自引决姑楊泣諭曰吾十七入姜門九載卽孀居獨不可留此身共晨夕乎杜大慟乃起視寢膳姑哭子復喪明左右翼之爲之衣食數十年邑令以姑婦節孝聞未報而楊卒慟哭淚盡繼之以血氣中斷不能言未幾亦謝世後奉文旌表

張氏儒童李來鳳妻來鳳卒子騰高甫三歲張年二十五守節撫孤流離兵患志操彌堅亂定後勤紡績延師教子列名庠序先是來鳳父生員光裕及二弟俱

知名仲季皆無嗣惟藐茲一孤撫養成立全李氏之
後邑令屠又良旌其門曰盡範流芳

盧氏生員世煜女歸生員李敦頤每篝燈讀書盧紡績
佐之琴瑟甚相得也敦頤病篤謂之曰汝齒尚少身
且無依奈何盧灑泣幾絕夫卒之次日遂投繯自盡
邑令周旌其廬

杜氏年十八適曹子美四年夫歿遺孤僅八月孤孀顧
連緝纊丙夜苦節五十餘年邑令趙旌其門曰節操
松栢

吳氏鄉民輔之女幼字軒之立未歸而夫故哀請往弔

其父不允未幾另擇配女飲泣終日自縊死聞者哀之

李氏李文郁女聊興隆妻兩家俱無尺寸土夫病且革謂曰汝年方二十無子且家貧我死宜速嫁李誓以身殉夫卒歸寧母欲其改適卽歸投繯死同夫葬於義塚觀者皆爲淚下

杜氏年十七歸諸生郝漢膏四載漢膏歿無子矢志守節請昆弟子爲漢膏後翁弗許欲析漢膏之產益他子而遣杜歸後翁歿諸昆弟亦執其亂命不爲立嗣氏不得已泣訴於邑令周周下其議旋陞任去再訴

於胡胡久而中止邑令趙如桓至復往懇趙乃集其昆弟於公廨設席論以情理皆感泣議乃定趙親造其門旌之翕然如初緝繡教子五十餘年旌表入祠黎氏明世襲指揮李欽寶之孫婦夫九義性孝篤志讀書以悅親心黎年二十五九義歿姑老子弱夫弟九江亦幼稚家業飄零苦志紡績拮据事姑畜子弟更竭力延師如是數十年曾孫永清中乙丑武進士次維清入膠庠九江孫琰登庚子鄉薦定邦亦入膠庠皆黎教養之力邑令姜扁獎之年八旬以壽終

楊氏周成儒妻姑病醫藥罔效焚香默禱割股以進姑

旒愈邑令以孝冠巾幘旌其門

任氏郭天正妻事姑極孝乾隆五年八月間姑病危醫藥罔效氏默行禱祝割左股肉作餅餌進之姑啖餅

立愈

彰善錄

李氏李亮臣女亮臣賣酒爲業居與于國喬近一日亮臣夫婦外出國喬託言買酒以言調之女堅拒得免至晚泣懇于母曰吾守貞未字而橫遭強暴義難再活遂縊死旌表入祠

李氏姜文成妻文成近痴而氏頗有色強暴者欲調之乘文成外出竊入其家李入室閉門自經邑令何扁

獎

陳氏薄有廣妻結褵五載夫死翁衰老家無擔石晝夜
紡績供甘旨家遇回祿翁病卧床褥陳呼天號泣火
熾入室救翁力怯不能負俱焚死里人咸稱烈孝云
聶氏張念茲妻年二十夫歿子甫歲餘族故寒薄有三
十年未葬之喪其母亦亡弟幼乃舉翁姑與夫及夫
祖父母叔祖父母俱以禮葬事訖携孤至母家兼撫
其弟稍長乃歸夫族姪有棄其女及夫婦亡女幼者
收養之守節三十九年旌表入祠

以後補傳凡存歿
年數只據請旌時

文冊
爲斷

熊氏年十八適齊望裔逾歲夫歿守節事翁姑撫嗣子
及二孫皆入邑庠年七十六而終旌表入祠

薄氏幼有至性年五歲父偶疾不食亦不食十七歸郝
育禮二十二夫歿孝事翁姑撫二歲孤守節四十五
年旌表

郝氏故明鴻臚鳴贊騰之女年二十歸張嗣祖姑邁沉
疾已二載卽脫簪珥侍湯藥又四年姑歿嗣祖方應
試翁老息弱附身附棺經營無遺憾嗣祖歸因未親
含殮悲慟而卒郝養老撫孤及翁喪值明末歲荒盜
起因急爲營葬哀感行路守節六十六年壽八十九